



Број/Број: **01/2a-50-1-2-63/10**

Сарајево/Sarajevo: 6.4.2010.

ZAPISNIK

63. sjednice Komisije za vanjske poslove Predstavničkog doma Parlamentarne skupštine BiH, održane 6.4.2010. godine

Sjednica Komisije počela je u 11 sati. Prisustvovali su: Slavko Matić, Husein Nanić, Azra Alajbegović, Lejla Klokić i Denis Bećirović.

Opravdano su odsustvovali: Azra Hadžiahmetović, Milorad Živković, Milica Marković i Sefer Halilović.

Osim članova Komisije, sjednici su prisustvovali Sead Avdić i Alija Muminović iz Ministarstva vanjskih poslova BiH, Grenko Arapović iz Ministarstva pravde BiH, Miroljub Krunić iz Ministarstva finansija i trezora BiH, Zorica Plakalović, Lidija Knežević i Endžo Raguž iz Ministarstva za promet i komunikacije BiH i Zoran Šainović iz Ministarstva odbrane BiH.

Sjednicom je predsjedavao Slavko Matić. On je pozdravio prisutne i otvorio raspravu o dnevnom redu 63. sjednice Komisije.

Denis Bećirović primijetio je da članovi Komisije iz SNSD-a u posljednje vrijeme ne dolaze na sjednice i pitao da li se radi o bojkotu Komisije ili je nešto drugo u pitanju, jer dolazimo u situaciju da se na sjednici Parlamenta, nakon što Komisija zauzme nekada i jednoglasne stavove, otvara iznova rasprava.

Merdžana Iglica je, što se današnje sjednice tiče, kazala da je Milica Marković na sjednici Komisije za popis stanovništva i ponovila da stalne komisije imaju prednost nad ad hoc komisijama.

Slavko Matić kazao je da nema odgovor i da nema ništa zvanično od predstavnika SNSD-a da oni ne žele ili da neće prisustvovati sjednicama Komisije te da on očekuje da će članovi Komisije iz SNSD-a učestvovati u radu Komisije.

Nije bilo prijedloga za izmjenu i dopunu te su članovi Komisije jednoglasno usvojili sljedeći

DNEVNI RED

1. Usvajanje Zapisnika 62. sjednice Komisije za vanjske poslove;
2. Davanje mišljenja o saglasnosti za ratificiranje:
 - a) Sporazuma između Vijeća ministara BiH i Vlade Crne Gore o prijevozu putnika i tereta u međunarodnom drumskom saobraćaju (resorno ministarstvo: Ministarstvo za promet i komunikacije BiH);
 - b) Sporazuma o zračnom saobraćaju između Vijeća ministara BiH i Vlade Ruske Federacije (resorno ministarstvo: Ministarstvo za promet i komunikacije BiH);

- c) Sporazuma o zajmu (Projekat poboljšanja životnih uslova na selu) između Bosne i Hercegovine i Međunarodnog fonda za poljoprivredni razvoj (resorno ministarstvo: Ministarstvo finansija i trezora BiH);
 - d) Sporazuma o finansiranju i projektu između KfW, Frankfurt na Majni, i Bosne i Hercegovine, koju zastupa Ministarstvo finansija i trezora BiH, kao i Federacije Bosne i Hercegovine, koju zastupa Federalno ministarstvo finansija, i Općine Bihać (Agencija za izvođenje projekata) – Prikupljanje i tretman otpadnih voda, Bihać (resorno ministarstvo: Ministarstvo finansija i trezora BiH);
 - e) Sporazuma o zajmu između Bosne i Hercegovine i Evropske banke za obnovu i razvoj za projekat Mahovljanska petlja (resorno ministarstvo: Ministarstvo finansija i trezora BiH);
 - f) Sporazuma između Bosne i Hercegovine i Republike Indije o međusobnoj pravnoj pomoći u krivičnim stvarima (resorno ministarstvo: Ministarstvo pravde BiH);
 - g) Memoranduma o razumijevanju između saveznog ministra odbrane i sporta Republike Austrije, Vijeća ministara BiH, Vlade Republike Hrvatske, Vlade Kraljevine Danske, Ministarstva vanjskih poslova Republike Francuske, Vlade Republike Mađarske, Vlade Republike Makedonije, Vlade Kraljevine Holandije, Vlade Kraljevine Norveške, Vlade Republike Poljske, Vlade Švicarske Konfederacije, Vlade Republike Turske, Vlade Ujedinjenog Kraljevstva Velike Britanije i Sjeverne Irske i Vlade Sjedinjenih Američkih Država vezano za saradnju u radu Centra za obuku za operacije potpore miru u Bosni i Hercegovini, (resorno ministarstvo: Ministarstvo odbrane BiH);
3. Davanje mišljenja o Izvještaju o radu Vijeća ministara BiH za 2009. godinu s posebnim osvrtom na Izvještaj o radu Ministarstva vanjskih poslova BiH;
 4. Godišnje izvještaj o Zaključenim međunarodnim ugovorima i stanju međunarodnih ugovora koji su u postupku ratificiranja (materijal MVP-a BiH);
 5. Davanje mišljenja o Zaključcima Vijeća Evropske unije za opće i vanjske poslove o Bosni i Hercegovini i operaciji ALTHEA (EUFOR);
 6. Izvještaji i materijali pristigli Komisiji:
 - a) Ratificiranje Sporazuma o stabilizaciji i pridruživanju sa BiH (materijal MVP-a BiH);
 - b) Odluka Vijeća EU za vanjske poslove o produženju mandata specijalnih predstavnika EU (materijal MVP-a BiH);
 - c) Pismo predsjednika Parlamentarne skupštine Vijeća Evrope Mevluta Čavašoglua predsjedavajućim oba doma Parlamentarne skupštine BiH;
 7. Tekuća pitanja.

Ad. 1. Usvajanje Zapisnika 62. sjednice Komisije za vanjske poslove

Zapisnik 62. sjednice usvojen je jednoglasno, bez primjedbi.

Ad. 2. a) Davanje mišljenja o saglasnosti za ratificiranje Sporazuma između Vijeća ministara BiH i Vlade Crne Gore o prijevozu putnika i tereta u međunarodnom drumskom saobraćaju

Sead Avdić je na početku kazao da su za svih sedam sporazuma ispunjene sve procedure i neophodni uslovi da Parlamentarna skupština BiH da saglasnost za ratifikaciju.

Zorica Plakalović iz Ministarstva za promet i komunikacije BiH je u vezi s ovim sporazumom kazala da je ovo tipski sporazum i da, u biti, nema nekih razika u odnosu na

ostale tipske sporazume. Ovim sporazumom liberaliziran je tranzitni prijevoz što znači da nema više dozvola za tranzitni prijevoz.

Nije bilo pitanja i Komisija je jednoglasno dala pozitivno mišljenje Predstavničkom domu u vezi s ratifikacijom ovog sporazuma.

Ad. 2. b) Davanje mišljenja o saglasnosti za ratificiranje Sporazuma o zračnom saobraćaju između Vijeća ministara Bosne i Hercegovine i Vlade Ruske Federacije

Endžo Raguž iz Ministarstva za promet i komunikacije BiH je, govoreći o ovom sporazumu, kazao da je procedura za njegovo potpisivanje pokrenuta još u junu 2004. godine na inicijativu Predsjedništva BiH. U međuvremenu su bila tri kruga pregovora i ministar Rudo Vidović potpisao je Sporazum 19.11. 2009.

Nije bilo pitanja i Komisija je jednoglasno dala pozitivno mišljenje Predstavničkom domu u vezi s ratifikacijom ovog sporazuma.

Ad. 2. c) Davanje mišljenja o saglasnosti za ratificiranje Sporazuma o zajmu (Projekat poboljšanja životnih uslova na selu) između Bosne i Hercegovine i Međunarodnog fonda za poljoprivredni razvoj

Miroljub Krunić iz Ministarstva finansija i trezora BiH kazao je da se radi o projektu poboljšanja životnih uslova na selu, odnosno poboljšanju poljoprivredne produktivnosti i efikasnosti u Federaciji BiH i Republici Srpskoj. Cilj Projekta je definiran kao održivo unapređenje života, prihoda i zaposlenosti ruralnih zajednica u projektnoj oblasti. Rok otplate je 20 godina sa četiri godine grejs perioda. Otplata zajma je u 30 jednakih polugodišnjih rata, počevši od 15. 9. 2014. i zaključno sa 15.3. 2029.godine.

Nije bilo pitanja i Komisija je jednoglasno dala pozitivno mišljenje Predstavničkom domu u vezi s ratifikacijom ovog sporazuma.

Ad. 2. d) Davanje mišljenja o saglasnosti za ratificiranje Sporazuma o finansiranju i projektu između KfW, Frankfurt na Majni, i Bosne i Hercegovine, koju zastupa Ministarstvo finansija i trezora BiH, kao i Federacije Bosne i Hercegovine, koju zastupa Federalno ministarstvo finansija, i Općine Bihać (Agencija za izvođenje projekata) – Prikupljanje i tretman otpadnih voda, Bihać

Miroljub Krunić bio je izvjestilac i za ovaj sporazum. On je kazao da vrijednost projekta 17.5 miliona eura i sredstva se odnose na prikupljanje i tretman otpadnih voda u Bihaću. Sporazum je baziran na finansijskoj pomoći koji je SR Njemačka omogućila Bosni i Hercegovini pod jako povoljnim uslovima.

Husein Nanić pitao je kad se očekuje početak realizacije sredstava iz ovog sporazuma.

Miroljub Krunić kazao je da je sva projektna dokumentacija gotova te da se očekuje da se do kraja 2013. godine iscrpe ovi finansijski izvori, mada postoji i klauzula u sporazumu po kojoj kreditor može odobriti i dodatno vrijeme za povlačenje ovih sredstava.

Komisija je jednoglasno dala pozitivno mišljenje Predstavničkom domu u vezi s ratifikacijom ovog sporazuma.

Ad. 2. e) Davanje mišljenja o saglasnosti za ratificiranje Sporazuma o zajmu između Bosne i Hercegovine i Evropske banke za obnovu i razvoj za projekat Mahovljanska petlja

Miroljub Krunić iz Ministarstva finansija i trezora BiH je za ovaj sporazum kazao da se radi o sredstvima od 21 milion eura, namijenjenim za projekat Mahovljanska petlja. Zajmoprimalac će otplaćivati zajam u 24 jednake polugodišnje rate koje će pristizati 4.6. i 4.12. svake godine, s tim da otplata zajma počinje 4.6. 2013., a završava se 4.12. 2024. godine.

Nije bilo rasprave i Komisija je jednoglasno dala pozitivno mišljenje Predstavničkom domu u vezi s ratifikacijom ovog sporazuma.

Ad. 2. f) Davanje mišljenja o saglasnosti za ratificiranje Sporazuma između Bosne i Hercegovine i Republike Indije o međusobnoj pravnoj pomoći u krivičnim stvarima

Grenko Arapović iz Ministarstva pravde BiH je vezano za ovaj sporazum kazao da je inicijativa za pokretanje sporazuma došla od Republike Indije 2007. godine. Ugovor je u skladu sa svim normama međunarodnog ugovornog prava i međunarodnim pravilima koja važe u ovoj oblasti. Ugovor je potpisan 28.9. 2009. u Indiji.

Nije bilo rasprave. Komisija je jednoglasno dala pozitivno mišljenje Predstavničkom domu u vezi s ratifikacijom ovog sporazuma.

Ad. 2. g) Davanje mišljenja o saglasnosti za ratificiranje Memoranduma o razumijevanju između saveznog ministra odbrane i sporta Republike Austrije, Vijeća ministara Bosne i Hercegovine, Vlade Republike Hrvatske, Vlade Kraljevine Danske, Ministarstva vanjskih poslova Republike Francuske, Vlade Republike Mađarske, Vlade Republike Makedonije, Vlade Kraljevine Holandije, Vlade Kraljevine Norveške, Vlade Republike Poljske, Vlade Švicarske Konfederacije, Vlade Republike Turske, Vlade Ujedinjenog Kraljevstva Velike Britanije i Sjeverne Irske i Vlade Sjedinjenih Američkih Država vezano za saradnju u radu Centra za obuku za operacije podrške miru u Bosni i Hercegovini

Zoran Šainović iz Ministarstva odbrane BiH kazao je da se radi o multilateralnom projektu između Bosne i Hercegovine i 13 država međunarodnih partnera u ovom projektu. Sam Memorandum predstavlja kontinuitet u radu projekta na osnovu sporazuma koji je zaključen 2003. godine između BiH i grupe međunarodnih partnera, prema kojem je uspostavljen Centar za obuku za operacije podrške miru u Butmiru. Samim tim sporazumom predviđeno je da se, nakon pet godina njegove primjene, 2009. godine, izvrši njegovo revidiranje i da se redefiniira status Centra i njegovog međunarodnog osoblja, te da se utvrdi instrument za prijenos nadležnosti i ovlaštenja na Ministarstvo odbrane BiH. Upravo su ovim memorandumom regulirana sva ova pitanja na način da će BiH 2013. godine automatski preuzeti ovaj centar koji će ući u strukturu Oružanih snaga BiH, a u međuvremenu će on funkcionirati kao međunarodni projekat gdje međunarodni partneri osiguravaju sufinansiranje materijalnih troškova i nastavni kadar. Odredbe samog teksta predviđaju da Memorandum za BiH postaje obavezujući za primjenu nakon potpisivanja najmanje jednog međunarodnog partnera.

Merdžana Iglica pitala je da li je neko od međunarodnih partnera već potpisao ovaj memorandum.

Zoran Šainović kazao je da je već pet partnera ušlo u sporazum do sada i to su ključni međunarodni partneri koji daju najveći finansijski doprinos, odnosno osiguranje nastavnog kadra.

Husein Nanić pitao je da li je ovaj centar za obuku smješten u BiH i ko sve učestvuje u tom centru za obuku.

Zoran Šainović rekao je da je riječ o centru u sklopu kampa Butmir, dakle u BiH, ali koji ima poseban status i jedini je centar u regiji koji ima status centra Partnerstva za mir i koji je kao takav priznat od NATO-a i kroz čiji rad Bosna i Hercegovina, uz pomoć međunarodnih partnera, daje doprinos u tom sistemu obuke. Kroz centar prolaze pripadnici Oružanih snaga BiH, zemalja regije i članica NATO-a. Koncept Centra je da je on otvoren i za državne službenike koji imaju kontakta s operacijama podrške miru, a ne samo za pripadnike Oružanih snaga.

Zoran Šainović ponudio se da u narednom periodu organizira prezentaciju Centra članovima Komisije za vanjske poslove.

Slavko Matić zahvalio se na izlaganju i pozivu da Komisija posjeti Centar za operacije podrške miru i izrazio nadu da će se u narednom periodu naći termin za realizaciju ove posjete.

Komisija je nakon toga jednoglasno dala pozitivno mišljenje Predstavničkom domu u vezi s ratifikacijom ovog memoranduma.

Merdžana Iglica iskoristila je prisustvo gosp. Šainovića i pitala ga za informaciju o pristupanju BiH u članstvo MAP-NATO, koja je bila na dnevnom redu jedne od prethodnih sjednica Komisije, a koju je Komisija za vanjske poslove zatražila od Ministarstva odbrane BiH.

Zoran Šainović kazao je da cijeni da Parlamentarna skupština BiH treba zadužiti Vijeće ministara BiH da dostavi informaciju o pristupanju MAP-u. Ministarstvo odbrane BiH je jedna od institucija koja ima nadležnosti ali Ministarstvo vanjskih poslova BiH po prirodi svog djelovanja ima sveukupno zaduženje za MAP i nosilac je čak i NATO koordinacijskog tima. On je kazao da može osigurati da Ministarstvo odbrane BiH dostavi svoju informaciju ali da bi ona pokrivala jednu četvrtinu sveukupnog procesa te se založio da se ovo pitanje realizira tako što će Vijeće ministara BiH dostaviti traženu informaciju.

Predsjedavajući Matić kazao je da je Komisija uputila Kolegiju Predstavničkog doma zaključak da Kolegij zatraži informaciju od Ministarstva odbrane BiH o sadašnjem stanju u vezi s pristupanjem BiH članstvu u MAP-NATO. Međutim, Kolegij je odgovorio da Komisija zatraži informaciju i da se opet vraćamo na to da bi Predstavnički dom trebalo da zatraži pomenutu informaciju od Vijeća ministara BiH.

Sead Avdić iz Ministarstva vanjskih poslova BiH kazao je da je nedavno došlo do rekonstrukcije NATO Koordinacijskog tima i za predsjedavajućeg tog tima izabrana je zamjenica ministra vanjskih poslova BiH i da misli da bi i to bila odgovarajuća adresa od koje bi se tražila pomenuta informacija.

Zoran Šainović kazao je da je NATO koordinacijski tim nosilac procesa ali da je pred Parlamentarnom skupštinom BiH za ovaj proces odgovorno Vijeće ministara BiH.

Ad. 3. Davanje mišljenja o Izvještaju o radu Vijeća ministara BiH za 2009. godinu s posebnim osvrtom na Izvještaj o radu Ministarstva vanjskih poslova BiH

Slavko Matić otvorio je raspravu i kazao da je ovo drugi ili treći put u mandatu da se ovako razmatra Izvještaj o radu Vijeća ministara BiH, te da misli da se ne radi o davanju mišljenja o radu Vijeća ministara BiH, s obzirom da se od Komisije traži mišljenje o onom dijelu koji se odnosi na Ministarstvo vanjskih poslova BiH. Na ovaj način stiže se dojam da je ovo skup pojedinačnih izvještaja o radu svakog ministarstva stavljenih u jedan izvještaj koji se onda razmatra u Predstavničkom domu.

Azra Alajbegović kazala je da je Zajednička komisija za ljudska prava, prava djeteta, mlade, imigraciju, izbjeglice, azil i etiku, čiji je član, ovaj izvještaj prihvatila kao informaciju, čime je ostavila mogućnost da na sjednici Predstavničkog doma poslanici daju mišljenje o izvještaju ako to smatraju potrebnim.

Sead Avdić se na početku izvinio u ime ministra vanjskih poslova BiH koji zbog brojnih obaveza nije mogao doći na sjednicu Komisije. U vezi sa Izvještajem o radu Ministarstva vanjskih poslova BiH, on je kazao da je urađen jedan uži izvještaj koji je bio standardiziran za sva ministarstva, a za vlastite potrebe urađen je jedan cjelovit godišnji Izvještaj o radu Ministarstva vanjskih poslova BiH. U ovom izvještaju, koji je u sklopu Izvještaja o radu Vijeća ministara BiH i koji je prihvatilo Vijeće ministara BiH, daje se dovoljno informacija za kritičku ocjenu o radu Ministarstva vanjskih poslova BiH i njegovih dometa u oblasti vanjske politike.

Alija Muminović iz Ministarstva vanjskih poslova BiH kazao je da ovo ministarstvo veoma ozbiljno pristupa izradi godišnjih izvještaja o radu i planova rada. Jedna od glavnih prepreka bila je neusvajanje zakona o vanjskoj politici. Taj zakon limitira sve druge aktivnosti, od sistematizacije do unutrašnjeg preuređenja u smislu kadrovske popunjenosti, preusmjeravanje težišta aktivnosti itd. On je kazao da je odsjek na čijem je on čelu sačinio cjelovit Izvještaj o radu Ministarstva vanjskih poslova BiH uključujući i Izvještaj o radu DKP-a. Pored toga, Izvještaj sadrži i planove posjeta kako na bilateralnom planu tako i planove multilateralanih skupova na kojima bi BiH aktivno participirala, kao članica ili posmatrač u određenim međunarodnim asocijacijama. U cjelovitom Izvještaju postoji šest priloga: Bilateralne posjete, vanjsktrgovinska razmjena, međunarodni sporazumi i ugovori, naučno-tehnička obrazovna i kulturna saradnja, diplomatska obuka zaposlenih i sastanci na multilateralnim skupovima, odnosno konferencijama. Vijeće ministara BiH postavilo je striktan zahtjev da izvještaj ne smije preći osam stranica i treba sadržavati sve ono što je relevantno i bitno kako bi se mogla steći slika o kvalitetnom radu Ministarstva vanjskih poslova BiH. Izvještaj je urađen stručno, bez političkih konotacija i on je odraz ukupnih bilateralnih i multilateralanih aktivnosti, na planu međunarodnopravnih i konzularnih poslova do sektora općih poslova, s naglaskom kako su radili pojedini odsjeci i samostalne organizacione jedinice u Ministarstvu vanjskih poslova BiH, kazao je Alija Muminović.

Sead Avdić rekao je da je Ministarstvo vanjskih poslova BiH u protekle dvije godine učinilo napore da donese i predloži novi koncept strateških pravaca i prioriteta u vođenju vanjske politike Bosne i Hercegovine. Taj dokument dostavljen je Predsjedništvu BiH koje ga je u dva navrata razmatralo i u postupku je usaglašavanja određenih formulacija i rješenja.

Očekivati je da će taj strateški dokument u narednih mjesec-dva dana biti dostupan za razmatranje i usvajanje u Parlamentarnoj skupštini BiH. Također je prije godinu dana počeo rad na izradi strategije i razvoja ekonomske diplomatije koji je završen i dokument se nalazi pred Kolegijem Ministarstva a nakon toga će biti dostavljen Vijeću ministara BiH i Parlamentarnoj skupštini BiH. I kao treće, završena je izrada strategije razrješenja stare devizne štednje kod Ljubljanske banke, Invest banke Beograd i drugih nedomicilnih banaka u BiH.

Slavko Matić kazao je da je smatrao da Parlamentarna skupština BiH treba razmatrati Izvještaj Vijeća ministara BiH kao kolektivnog organa a ne Izvještaj o radu koji je skup ili objedinjeni pojedinačni izvještaji ministarstava. Na sjednici Komisije za saobraćaj i komunikacije također je konstatirano da je Ministarstvo za promet i komunikacije BiH napravilo puno širi izvještaj o radu Ministarstva, te da je samo jedan mali dio ušao u ovaj objedinjeni Izvještaj o radu Vijeća ministara BiH. U stvari, taj objedinjeni izvještaj skup je pojedinačnih izvještaja o radu pojedinih ministarstava, kazao je Slavko Matić.

Husein Nanić kazao je da je pažljivo pročitao Izvještaj koji se odnosi na rad Ministarstva vanjskih poslova BiH i naglasio da ono što je bio problem prošle godine to što su mnoge nadležnosti vanjske politike na Predsjedništvu BiH i onda dolazimo do toga, kada smo tražili raspravu u Parlamentu o nekim bitnim stvarima, da mi u Parlamentu nemamo mogućnost uticaja na te stvari. On je kazao da u Izvještaju ima i stvari koje treba pohvaliti kao što je uspostavljanje diplomatskih odnosa sa 11 država, izrada akcionog plana vezanog za ekonomsku diplomatiju. S druge strane, ima stvari koje treba jasno identificirati kao npr. zašto nismo dobili status za članstvo u MAP-u. Vezano za liberalizaciju viznog režima, treba jasno reći da su svi uslovi koji su ispunjeni djelo ove vlasti i da je ružno čuti od nekih ljudi iz opozicije da je nama neko dao da dođemo do ispunjenja svih uslova. Dodao je da se teško može uporediti šta je bilo planirano i šta je od toga realizirano te da bi Izvještaj trebalo razmatrati kao cjelinu, kao i da se slaže s razmišljanjem predsjedavajućeg Matića.

Denis Bećirović kazao je da je sasvim sigurno da od prve narodne vlade Rodoljuba Čolakovića 1945. godine do danas ova zemlja nije imala gore Vijeće ministara. On je kazao da će se u svojoj diskusiji zadržati samo na dijelu gdje se govori o radu Vijeća ministara BiH a da se neće referirati na dio o radu Ministarstva vanjskih poslova BiH. Sve ono što su doživjeli građani Bosne i Hercegovine u 2009. godini predstavlja jednu veliku blamažu svih ljudi u ovoj zemlji, ali ne samo građana BiH već i legalno izabраниh poslanika u Parlamentu BiH koji su birali to Vijeće ministara. Čak je i iz parlamentarne većine mnogo više nego iz opozicije tokom 2009. godine ukazivano na tu silnu neodgovornost Vijeća ministara BiH, koju je dovoljno ilustrirati činjenicom da postoji dvjesto zaključaka Parlamenta za koje je glasala ne samo opozicija nego i parlamentarna većina, koje Vijeće ministara BiH nije realiziralo. Da ne bi bili subjektivni, kazao je, treba prelistati zvanični izvještaj Vijeća Evrope koji bez izuzetka govori da ovo Vijeće ministara nije ispunilo svoju misiju i zadaću, svoj plan i program rada i da je ova zemlja krenula nazad. To su ocjene koje dolaze iz cijele Evrope. Da nema ništa od ovih pobrojanih razloga, dovoljno je reći da su Makedonija, Crna Gora, Srbija, gotovo cijeli Balkan, izuzev Albanije, dobili liberalizaciju viznog režima a da građani BiH to pravo nemaju. Da je bilo imalo morala u tom Vijeću ministara, svi bi kolektivno podnijeli ostavku nakon što se čitav region radovao, a BiH bila u poziciji u kojoj je bila, kazao je Denis Bećirović i dodao da će ga posebno interesirati na sjednici Parlamenta hoće li iko odgovarati za situaciju u vezi sa izborom ministra sigurnosti BiH gdje je izgubljeno pola godine na tom pitanju. Također je iznio niz kritika na rad Vijeća ministara BiH, navodeći, uz ostalo, kao primjer parlamente Hrvatske i Srbije koji, kako je rekao, za godinu dana usvoje zakona

koliko Vijeće ministara BiH nije ni za četiri godine. Posebno je kritizirao rad predsjedavajućeg Vijeća ministara BiH Nikole Špirića. Na kraju svoje diskusije predložio je da Komisija usvoji sljedeći zaključak - da Komisija za vanjske poslove ocijeni negativnim djelovanje Vijeća ministara BiH i da se složi sa svim ocjenama koje su došle od Vijeća Evrope i brojnih drugih evropskih tijela koji su dali svoje nalaze o situaciji i stanju u Bosni i Hercegovini u 2009. godini.

Predsjedavajući Komisije Slavko Matić podsjetio je Denisa Bećirovića i sve članove Komisije da je Kolegij Komisiji dostavio zahtjev za razmatranje Izvještaja o radu Vijeća ministara, ali onog dijela Izvještaja koji se tiče Ministarstva vanjskih poslova BiH, te pozvao članove Komisije da se u svom zaključku baziraju na onaj dio koji se odnosi na Ministarstvo vanjskih poslova BiH. Predsjedavajući Matić kazao je da će na sjednici Doma rasprava biti sasvim drugačija te da će tamo svako moći govoriti općenito o Izvještaju o radu Vijeća ministara BiH.

Denis Bećirović rekao je da tačka dnevnog reda glasi – Izvještaj o radu Vijeća ministara BiH – s posebnim osvrtom na rad Ministarstva vanjskih poslova BiH i da je dao prijedlog zaključka vezan za Izvještaj o radu Vijeća ministara BiH u skladu s dnevnim redom koji smo prihvatili.

Husein Nanić rekao je da svako ima pravo iznijeti svoje mišljenje, ali da članovi Komisije pripadaju najširoj političkoj opciji koja želi sačuvati integritet BiH, te da, stoga, ne bi trebalo govoriti s ironijom o nekim stvarima. Rekao je da poslanici u Parlamentarnoj skupštini BiH, u ovim teškim vremenima, treba da daju doprinos da BiH ide korak po korak naprijed.

Predsjedavajući Matić zaključio je raspravu i na glasanje dao dva zaključka:

Prvi zaključak koji je predložio Denis Bećirović - da Komisija za vanjske poslove ocijeni negativnim djelovanje Vijeća ministara BiH i da se složi sa svim ocjenama koje su došle od Vijeća Evrope i brojnih drugih evropskih tijela koji su dali svoje nalaze o situaciji i stanju u Bosni i Hercegovini u 2009. godini.

“Za” ovaj zaključak glasao je jedan član Komisije, dva su glasala “protiv”, dva su bila “suzdržana”.

Predsjedavajući je konstatirao da ovaj zaključak nije dobio većinu.

Predsjedavajući je iznio sljedeći zaključak – **da Komisija za vanjske poslove prihvata Izvještaj o radu Vijeća ministara BiH u dijelu koji se odnosi na Ministarstvo vanjskih poslova BiH i predlaže Domu njegovo usvajanje.**

Ovaj zaključak je usvojen s četiri glasa “za” i jednim glasom “protiv”.

Predsjedavajući je rekao da će se u mišljenju prema Domu navesti sadržaj i zaključka koji na Komisiji nije dobio većinu.

Ad. 4. Godišnji izvještaj o Zaključenim međunarodnim ugovorima i stanju međunarodnih ugovora koji su u postupku ratificiranja (materijal MVP-a BiH)

Predsjedavajući je rekao da ovaj izvještaj sadrži četiri cjeline: Ugovori koji su ratificirani u 2009. godini, Ugovori čiji je postupak ratifikacije u toku, Ugovori za koje je pokrenuta inicijativa za zaključivanje i Ugovori za koje je Ministarstvo vanjskih poslova BiH dalo pozitivno mišljenje o vanjskopolitičkoj opravdanosti. Rekao je da je ovo dobra praksa i da bi je trebalo nastaviti i u narednim godinama kako bi se imao pregled šta je urađeno i šta se još treba uraditi u domenu međunarodnih ugovora. Predložio je da Komisija ovaj izvještaj prihvati.

Husein Nanić rekao je da treba pozdraviti ovakav način izvještavanja.

Predsjedavajući Matić konstatirao je zaključak – da Komisija prihvata Godišnji izvještaj o zaključenim međunarodnim ugovorima i stanju međunarodnih ugovora koji su u postupku ratificiranja i pozdravlja ovakav način izvještavanja, što treba nastaviti i u narednim godinama.

Ad. 5. Davanje mišljenja o Zaključcima Vijeća Evropske unije za opće i vanjske poslove o Bosni i Hercegovini i operaciji ALTHEA (EUFOR)”

Predsjedavajući je rekao da se ova tačka našla na dnevnom redu Doma na zahtjev ove komisije, te da Komisija o ovome treba dati svoje mišljenje. Naglasio je da su ovo zaključci Vijeća Evrope i da Dom njih ne bi trebalo da prihvata ili ne, nego bi trebalo ići sa zahtjevom u smislu njihove realizacije. Predložio je zaključak da **Komisija predlaže Predstavničkom domu da ove dokumente primi k znanju i da pozove sve nadležne institucije na ispunjavanje obaveza utvrđenih u ovim dokumentima.**

Komisija je jednoglasno usvojila ovaj zaključak.

Ad. 6. Izvještaji i materijali pristigli Komisiji:

- a) **Ratificiranje Sporazuma o stabilizaciji i pridruživanju sa BiH (materijal MVP-a BiH);**
- b) **Odluka Vijeća EU za vanjske poslove o produženju mandata specijalnih predstavnika EU (materijal MVP-a BiH);**
- c) **Pismo predsjednika Parlamentarne skupštine Vijeća Evrope Mevluta Čavašoglua predsjedavajućim oba doma Parlamentarne skupštine BiH.**

Komisija je primila k znanju navedene informacije.

Predsjedavajući je konstatirao u okviru tekućih pitanja nema tema i zaključio sjednicu.

Sjednica Komisije završena je u 12.15 sati.

SEKRETAR KOMISIJE

Merdžana Iglica

PREDSJEDAVAJUĆI KOMISIJE

Slavko Matić

Dostavljeno:

- naslovu
- a/a